

Naalakkersuisut danskillu naalagaaffiata akornanni paasissutissat immikkoortitat paarlaasseqatigiissutigineqartut imaluunniit suleqatigiinnermut atatillugu suliarineqartut sillimaniarnikkut illersorneqarnissaat pillugit kaajallaasitaq

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersumi § 23, imm. 1 naapertorlugu makkua aalajangersarneqarput:

Danskit naalagaaffiata aamma Naalakkersuisut akornanni paasissutissat immikkoortitat illuatungeriinnit tamanit illersorneqarnissaat paarlaasseqatigiiffiginissaallu, Nordatlantiske Tratat Organisation (NATO) kiisalu nunani tamalaani isumaqatigiissutit nunalu tamakkerlugu inatsisit eqqarsaatigalugit paasissutissat immikkoortitat sillimaniarnikkut illersorneqarnissaannik pisussaaffeqartoqarpoq.

Kaajallaasitaq una paasissutissanik immikkoortitanik Naalakkersuisut danskillu naalagaaffiata akornanni paarlaasseqatigiinnikkut imaluunniit suleqatigiinnerinut atatillugu suliarineqartut eqqarsaatigalugit atuutsinneqarpoq. Kaajallaasitartaaq paasissutissat immikkoortitat paarlaasseqatigiissutigineqarnerini qaqilerneqartut imaluunniit tamanga tunngavigalugu paasissutissanut atuutsinneqarpoq.

Paasissutissap ilusaa annertussusaalu atuutilernissaa, atorunnaarsinneqarnissaa, assartorneqarnissaa, attaveqaqatigiissutiginnissaa, allagaatiginissaa toqqortaatiginissaaluunniit qanoq ikkaluarpat sillimaniarnikkut illersuinissamut malittarisassat atuutissapput.

Paasissutissat illersorneqarnerini sulisunit, timitalimmik najoqqutassatigullu suliniuteqarnikkut pissapput, ilaatigut susassaqqanngitsunut illersorneqarlutillu allanngortinnissai eqqarsaatigalugit kiisalu atuisutut akuerisanit atorineqarnissaannut pissarsiassaritinneqartussanngorlugit.

Sillimaniarnikkut suliniutaasut atorineqarnissaasa qanoq annertutiginissai eqqarsaatigalugit kaajallaasitami immikkoortitatigut atortorissaarut malillugu aalajangersassapput.

I. Immikkoortitaanera

§ 1. Paasissutissat suulluunniit NATO-mik ilisarnaatilersukkat kiisalu paasissutissat NATO-mi nunanit ataatsimut soqutigisarineqartut sillimaniarnikkut illersugassaasariaqartut immikkoortitaassapput malittarisassat ataani allaqqasut malillugit:

- 1) ISERTUUSSAALLUINNARTOQ («COSMIC TOP SECRET»): Taamatut immikkoortitsineq paasissutissanut atorneqassaaq pisinnaatitsissummillu pissarseqqaarnani ingerlatitseqqiineq pissappat Kunngeqarfik Danmarki imaluunniit NATO-mi nunat annertuumik ajoqusingaatsiarneqarsinnaapput.
- 2) ISERTUUSSASSAQ («NATO SECRET»): Taamatut immikkoortitsineq paasissutissanut atorneqassaaq pisinnaatitsissummillu pissarseqqaarnani ingerlatitseqqiineq pissappat Kunngeqarfik Danmarki imaluunniit NATO-mi nunat annertuumik ajoqusingaatsiarneqarsinnaapput.
- 3) ISERTUUSSAQ («NATO CONFIDENTIAL»): Taamatut immikkoortitsineq paasissutissanut atorneqassaaq pisinnaatitsissummillu pissarseqqaarnani ingerlatitseqqiineq pissappat Kunngeqarfik Danmarki imaluunniit NATO-mi nunat annertuumik ajoqusingaatsiarneqarsinnaapput.
- 4) SULINERMUT ATATILLUGU ATUGASSAQ («NATO RESTRICTED»): Taamatut immikkoortitsineq paasissutissanut atorneqassaaq tamanut saqqummiuteqqusaanngitsunut imaluunniit susassaqaanngitsunut paasissutissiissutigeqqusaanngitsunut.

Imm. 2. Nunat allat NATO-mik immikkoortitatut nalunaaqutsersorsimasui imm. 1-imi immikkoortitatut assingusumik nalunaaqutsersorsimasutut inissinneqassapput. Nunamut immikkoortitatut nalunaaqutsersukkat nunanilu tamalaani aaqqissuussatigut immikkoortitatut nalunaaqutsersorsimasui sapinngisamik imm. 1-imi immikkoortitatut assingusumik nalunaaqutsersorsimasutut inissinneqassapput.

§ 2. Immikkoortitatut inissisimaneq paasissutissat imarisaat paasissutissanillu pissarsiffiusut tunngavigalugit aalajangersaaffigineqassaaq. Paasissutissap qanoq immikkoortitamik imaqarnerata nalilernerani inaarutaasumik suliarisamik tunngaveqartumik paasissutissat ilaat attuumassuteqaanngitsutut ittumik immikkoortitaanissaat pisariaqarsissaaq. Inaarutaasumik suliarisaaq paasissutissat ilaattut immikkoortitap qaffasinnerpaajusup appasinnerusumik inissinnissaa pissanngilaq.

§ 3. Allagaatini paasissutissat ilaat ataasiakkaatut immikkoortitaanissaat pisariaqarsinnaavoq (immikkoortitat ilaat). Immikkoortitat ataasiakkaajusut ersarissumik allaqqatinneqassapput.

§ 4. Paasissutissat immikkoortitaanerini immikkoortitat inissisimanerat appasinnerpaajutillugu sillimaniarnikkut piumasaqaammut naapertuuttuutinneqassaaq.

Imm. 2. Paasissutissat iluani ilanngussamik assigisaannilluunniit imaqartinneqartoq iluani ilanngussatut immikkoortitat qaffasinnerpaanit appasinnerusutut inissisimatinneqassanngillat. Aktpak-it (charteques) aktpak-ini (charteque'et) paasissutissatut immikkoortitani qaffasinnerpaatut minnerpaamik immikkoortitaasimassapput.

§ 5. Allakkiaq paasissutissatut ilanngunneqartoq immikkoortitaq qaffasinnerpaajusutut inissisimasutut qaffasitsigitinneqassaaq. Allakkiaq tassaasariaqarpoq paasissutissatut ilanngunneqartut immikkoortitat peerneqartillugit immikkoortitatut appartinneqarnerinut imaluunniit immikkoortitaajunnaarneratut uppersaataasut.

§ 6. Paasissutissat sillimaniarnikkut illersortariaqartut § 1-imi allaaserineqartutut immikkoortitaaneri atuilersitsisup akisussaaffigissavai.

§ 7. Atuilersitsisup paasissutissanik uppersaanermigut imaluunniit ilitsersuinermigut paasissutissat piffissaliilluni immikkoortitat appartinneqassasut imaluunniit immikkoortitaajunnaassasut aalajangersinnaavaa.

Imm. 2. Paasissutissat immikkoortitaasimasutut suliarereersimasut piumasaqaatitut immikkoortitaanissaat pisariaarussimatillugu immikkoortitaaneri appartinniarlugit imaluunniit immikkoortitaajunnaarnissaat siunertaralugit atulersitsisusup akulikitsumik misissuataartassavai. Immikkoortitaanerisa appartinneqarneri immikkoortitaajunnaarnerilu paasissutissanik tiguisumut nalunaarutigisassapput.

Imm. 3. Paasissutissat immikkoortitaasut immikkoortitatut appartinneqarnissaannut aamma immikkoortitaajunnaarsinneqarnissaannut atatillugu immikkoortitaasut nalunaaqutsersimaqqaarneqarneri qaavisigut titarneqartassapput, ammalu immikkoortitamik nutaamik qaavatigut ilanngussisoqarsinnaalluni.

§ 8. Paasissutissanik immikkoortitanik tiguisoq imaassanngilaq:

1) paasissutissat suliakkiisup allakkatigut akuersiteqqaarnagu immikkoortitanik appartitsinani imaluunniit immikkoortitaajunnaarsitsilluni,

2) suliakkiisup aalajangersagaanit siunertanut allanut tunngatillugu paasissutissat allanut atorlugit,

3) paasissutissat taaguummik NATO-mik nalunaaqutsersorsimasut, kiisalu nuna tamakkerlugu paasissutissat NATO-mi nunani ataatsimut soqutigisarineqartut NATO-p avataanut imaluunniit nunani tamalaani kattuffeqarfinnut suliakkiisup allakkatigut akuersiteqqaarnagu nunalu pineqartup naleqquttumik isumaqatigiissuteqaqaartinnagu imaluunniit paasissutissat immikkoortitaasut illersorneqarnissaat pillugit kattuffiusumut ingerlateqqillugit.

Imm. 2. Paasissutissat suliakkiisup appasippallaartumik immikkoortissimappagit tiguisup qaffasinnerusumut immikkoortissinnaavai. Immikkoortitaasut qaffasinnerusunngortissappata suliakkiussisoq ernertumik nalunaarfigineqassaaq.

§ 9. Digitalimik toqqorsiviusutut atorneqartut paasissutissanik elektronikkikkut atortorissaarutini danskit naalagaaffianit atukkiunneqartuni atorneqassanngillat, taamaattoq tak. § 25

II. Paasissutissat immikkoortitaasut takusinnaaneri

§ 10. Paasissutissat immikkoortitaasut inunnut paasissutissanik immikkoortitatigut annertussusilikkat sillimaniarnikkut akuerisaanngitsunut pissarsiassanngortinneqasanngillat.

§ 11. Oqartussani sulisut namminersortullu suliffeqarfini sulisut pisortani oqartussaqaarfinnik sullissisuusut sillimaniarnikkut akuerineqarnissaat pisortani oqartussaqaarfiup aalajangiiffigisassavai.

Imm. 2. Paasissutissat ISERTUUSSAALLUINNARTUTUT immikkoortitaasutut sillimaniarnikkut suliarineqarnissaannut akuerisassat piffissami aalajangiinnermiit sivisunerpaamik ukiut tallimat atuuttassapput. Paasissutissat ISERTUUSSASSATUT aamma ISERTUUSSATUT immikkoortitaasut

piffissami aalajangiinnermiit sivisunerpaamik ukiuni qulini atuuttassapput.

Imm. 3. Politiit isertortumik paasiniaasartui sulisut sillimaniarnikkut akuerineqarnissaat pillugit pisortani oqartussa qarfiup aalajangiinnerminut atugassaanik sillimaniarnikkut misissuisassapput.

§ 12. Sillimaniarnikkut akuersinissamut aalajangerneq paasissutissat inummut tunngasut sukumiisumik naliliiffigineranik tunngaveqassaaq. Matumani immikkut pingaartinneqassaaq pineqartoq:

- 1) assortugassaanngitsumik tunniusimasuunersoq aamma
- 2) pissuseqarneratigut qanorlu ittuuneratigut, matumani ileqqi, attaveqaatai isertuussisinnaneralu eqqarsaatigalugittaaq, paasissutissanik immikkoortitanik suliaqarneranut atatillugu pineqartup tutsuiginassusaa qularutigineqassanngitsoq.

Imm. 2. Katissimasap, inooqatigisap, aapparisp imaluunniit najugaqatigisap pissusilersornera, qanoq issusaa attuumassuteqarneralu sillimaniarnikkut akuersinissamut aalajangernermi ilanngullugu pingaartinneqassaaq.

§ 13. Sillimaniarnikkut inunnut akuersineq taamaallaat pissaaq pineqartup paasissutissanut immikkoortitanik takunnissinnaanera pisariaqarsorineqarpat imaluunniit pineqartup atuuffiit isumagisassai pisariaqarsorineqarpata.

Imm. 2. Pisortani oqartussa qarfinni inuit sillimaniarnikkut akuerineqarsimasut pillugit allattorsimaffik nutartigaassaaq, assersuutigalugu sillimaniarnermi officerimi, tak. § 45. Immikkoortitsinermut paasissutissat pineqartumut akuerisaasut kiisalu sillimaniarnikkut akuersissuteqarnermi ulloq atulersitsiffik aamma piffissaq atuunnera allattorsimaffimmi allassimassapput.

§ 14. Paasissutissatut immikkoortitat inunnut taamaallaat sulinermut atatillugu pisariaqavissumik takunnissinnaatitaasunut takunnissinnaatitaaneqassaaq (»Need to Know«).

Imm. 2. Paasissutissatut immikkoortitat sulinermut atatillugu pisariaqavissunngippat takunnissinnaatitaaneq pisariaqanngilaq (»Need to Know«).

Imm. 3. Paasissutissatut immikkoortitanik misissuisussasut imaluunniit suliaqartussaasut paasissutissat imarisaannik takunninnissamik susassaqaanngitsunut takutittannginnissaat qulakkiissallugu tamatigut qulakkiigassarivaat.

§ 15. Sillimaniarnikkut akuersissuteqarnermut atatillugu kaajallaasitaq una aamma pinerluttuliornermut inatsimmi kapitali 7, 8 aamma 11 pineqartumut ilisimatitsissutigineqassapput.

Imm. 2. Inuit sillimaniarnikkut akuerineqartut tamarmik paasitinneqassapput sillimaniarnikkut akuersinermi paasissutissanik illersuinissaq pineqartillugu NATO-mi sillimaniarnikkut isumaqatigiissutitut tunngasut.

III. Paasissutissanik immikkoortitanik suliaqarneq

§ 16. Paasissutissatut immikkoortitanik suliaqarnissaq inunnut pisortani oqartussa qarffimmit paasissutissanik immikkoortitatut pineqartumut suliarinnittussatut akuerineqartumut taamaallaat isumagisassanngortinneqartassapput.

§ 17. Paasissutissatut immikkoortitaq sapinngisamik amerlassutsikkut killilersimaarneqassaaq.

§ 18. Immikkoortitap qanoq ittuunera paasissutissatut immikkoortitami allaganngorlugu allakkap saqqaani kiisalu allakkap quppernerini allani tamani ersarissumik nalunaaqutsersimatillugu takussutissanngortissaaq, tak. ilanngussatut ilanngussaq.

Imm. 2. Allakkiaq arlalinnik qupperneqarpat, quppernerit illersorsinnaasumik katitersimassapput, aamma quppernerit normulersorsimassapput.

Imm. 3. Allakkiaq ISERTUUSSAALLUINNARTUMIK imaluunniit ISERTUUSSASSAMIK nalunaaqutsersimasut qupperneq siullermiit normulersugaassapput. Allakkiaq ataasiinnaanngitsumik assersuutitaqartinneqarpat assersuutitut ilanngussat tamarmik normulersorneqarsimassapput.

§ 19. Paasissutissatut immikkoortitanik suliaqarneq, matumani assiliilluni allanneq, anillatsitsineq, assiliineq, nutserineq imaluunniit allatigut ingerlatitseqqiineq sulinermut atatillugu pisariaqavissumik pisoqarpat aatsaat pissaaq, taamaattoq tak. imm. 2.

Imm. 2. Paasissutissat ISERTUUSSAALLUINNARTUTUT immikkoortitat nalinginnaasumik suliakkiisumut pisinnaatitsissummik pissarsiniartoqaqqaartinnani tiguisup tamakkiisumik ilaannakortumilluunniit ingerlateqqissanngilai. Tiguisup suliakkiisup pisinnaatitsinissaa utaqqisinnaajunnaarsimaguniuk, aamma paasissutissat ingerlateqqinneqassasut pisariaqavissorpat, pineqartup pisortani oqartussaqaarfimmi pisortarisaminit pisinnaatinneqarnermigut paasissutissat ingerlateqqissinnaavai. Ingerlatitseqqiineri imaassaaq.

1) paasissutissat ISERTUUSSAALLUINNARTUTUT immikkoortitat inummit suliarinninnissamut akuerisaasumit suliarineqassapput,

2) nalunaarsuiffiit assersuusiallu allaqqaarneqartut suliakkiisup aqqa ersitsillugu normulersorneqarsimasunik ilaqartinneqassallutik,

3) ingerlatitseqqiisup allakkiaq suliarinnittuanit immikkut assersuusiamik ilaqartinneqassaaq, aamma

4) suliakkiisoq ingerlatitseqqiinerit qanoq amerlatigisut suliarineqarsimanersut nalunaarfissaq nalunaarfialugu.

Imm. 3. Paasissutissat allakkatigut ingerlateqqinneqassappata, allakkat nalunaaqutsersimassapput imatut ISERTUUSSAALLUINNARTOQ, tak. § 18.

§ 20. Siunnersuutitut allakkiaq, oqaaseqaatit attaveqaatitigullu paasissutissat, assersuutigalugu digitalikkut toqqorsimasuutit paasissutissanik immikkoortitanik naammassinninnissamut tunngavissiisut, atornerqarnerisa kingorna paasissutissatut immikkoortitatut isumagineqassapput.

§ 21. Paasissutissat immikkoortitat oqaasiinnakkut allatigulluunniit oqaatigalugu ingerlateqqinneqartut allanit tusarnaartoqartillugu ingerlateqqinneqassanngillat.

§ 22. Pisortat oqartussaqaarfiini inini ataasiakkaani paasissutissatut immikkoortitat inummiit inummut tunniunniarneqartillugit, inuit pineqartut sillimaniarnikkut akuerisaasuusimasut akornanni pissaaq, tunniunneqartullu matoqqatinneqarlutik tunniussisussatut toqqakkamik imaluunniit toqqissisimanartinneqartumik tunniussineq pissalluni. Paasissutissat matoqqasuutinneqaratik

tunniunneqassappata, paasissutissat imarisaat susassaqanngitsunut takuneqarsinnaajunnaarlugit tunniunneqartassapput.

§ 23. Paasissutissat immikkoortitat tiguneqarnerini ernertumik nalinginnaasumik nalunaarsorsimatinneqassapput.

Imm. 2. Nalunaarsugaasut paasissutissat immikkoortitanik imallit paasissutissat immikkoortitat qaffasinnerpaamik inissisimasutut nalunaarsorsimatinneqassapput.

IV. Paasissutissat elektronikkikkut atortutigut isumagineri

§ 24. Paasissutissat immikkoortitaasut elektronikkikkut suliarineqartut paarlaasseqatigiissutaasut suleqatigiinnerminilu suliarineqartut paasissutissat elektronikkikkut atortut paasissutissat immikkoortitat suliarineqarnissaat siunertarlugit danskit naalagaaffianiit atortutigut atugassiissutaasut kisiisa atorlugit suliarineqassapput.

Imm. 2. Paasissutissat immikkoortitat elektronikkikkut suliarineqartussat SULINERMUT ATATILLUGU ATUGASSATUT immikkoortitaasut, paasissutissat elektronikkikkut atortut atorlugit suliarinerisa imm. 1-imi taaneqartut saniatigut, paasissutissat elektronikkikkut atortut Illersornissamut Oqartussanit akuerineqaaqarsimasut atorlugit suliarineqartassapput.

Imm. 3. Paasissutissat elektronikkikkut atortut danskit naalagaaffianiit atukkiussaasut saniatigut avataaniit paasissutissat elektronikkikkut atortunik ilanngussisoqassanngilaq.

Imm. 4. Paasissutissat elektronikkikkut atortut avataaneersut paasissutissat elektornikkikkut atortunut imm. 2-mi taaneqartunut ilanngunneqarneri taamaallaat Illersornissamut Oqartussanit immikkut akuersissuteqarnikkut pisinnaavoq.

Imm. 5. Paasissutissat elektronikkikkut atortuini danskit naalagaaffiannit atukkiussaasuni hardware aamma software iluaneereersut allanngortequsaanngillat.

Imm. 6. Paasissutissat elektronikkikkut atortut atorlugit paasissutissat ISERTUUSSAALLUINNARTUMIK nalunaaqutersimasut suliarineqarnissaanni tamatigut Illersornissamut Oqartussanit immikkut ittumik akuersissuteqarnikkut pisassaaq.

§ 25. Digitalimik toqqorsimasuutit paasissutissanik immikkoortitanik suliaqarnissamut danskit naalagaaffianiit atukkiunneqartut taamaallaat § 24, imm. 1 aamma 2 malillugit paasissutissanik elektronikkikkut atortut suliarinerini atoqqusaapput. Digitalimik toqqorsimasuutit tunniunneqarneri Digitalimik Sullissinermut Aqutsisoqarfimmut saaffiginninnikkut pissaaq, tak. § 46.

Imm. 2. Digitalimik toqqorsimasuutit paasissutissat immikkoortitaasut imarisaasa qanoq ittueneri naapertorlugit immikkoortinneqarlutillu illersorneqassapput. Toqqorsimasuutit taama ittut taamaammat paasissutissat toqqorsimasuutigineqartutut imaluunniit toqqorsimasuutigineqarsimasutut qaffasinnerpaamik immikkoortitatut nalunaaqutersimasapput. Toqqorsimasuutini paasissutissat immikkoortitaasut takussutissartai paasissutissat immikkoortitaasut allakkatigut suliarineqassapput. Matumani paasissutissat annertuujutillugit immikkoortitatut allassimasuusut qaffasinnerusumik immikkoortitaasussatut inissisimasariaqarneri eqqarsaatigineqassapput.

Imm. 3. Digitalimik toqqorsimasuutit paasissutissanik ISERTUUSSASSANIK qaffasinnerusumilluunniit immikkoortitaasut, nalunaarsugaasassapput immikkut ilisarnaataanik normulerneratigut

paasissutissartalimmik. Illersornissamulli Oqartussat sillimaniarnermut akuersissuteqarnerani nalunaarsorsimasussatut piumasaqaataasoq pinngitsoortissinnaavaa.

Imm. 4. Digitalimik toqqorsimasuutitut immikkoortitaasut immikkoortitaaneri appartinneqassanngillat najoqqutassallu akuerisaasut naapertorlugit nungutinneqartassallutik, aamma qanorluunniit paasissutissat immikkortitaasut nungutinneqarsimasutut inissisimagaluarpata.

§ 26. Paasissutissat immikkoortitaasut SULINERMUT ATATILLUGU ATUGASSAT imaluunniit qaffasinnerusutut inissisimasut aamma pisortani tele-mi attaveqaatitigut allatigulluunniit attaveqaatitigut pisortani oqartussaqaarfiit piginngisaatigut nassiussassaasut illersornissaannut paasiuminaallisarlugit periuseqarnermi, Illersornissamut Oqartussanit akuerineqaqqaassapput.

§ 27. § 24, imm. 2-mi aamma § 26-mi sillimaniarnermut akuersinissaq naapertorlugu atulersitsineq pitinnagu paasissutissanut elektronikkikkut atortut sillimaniarnikkut piumasaqaataasut naammassisimassagai qulakkeerneqassapput. Taamaattumik paasissutissanut elektronikkikkut atortunik pissarsiniarnermi pilersaarusiornermut atatillugu, imaluunniit paasissutissanut elektronikkikkut atortunik akuerisaasimasunik allannguinermi Illersornissamut Oqartussat sapinngisamik siusinnerpaamik peqataatinneqassapput.

§ 28. Sillimaniarnermik akuersissuteqarnissamut atatillugu sillimaniarnermut suliniutinut sillimaniarnikkut immikkut piumasaqaatit najoqqutassiallu Illersornissamut Oqartussanit akuerineqartussat Digitalimik Sullissinermut Aqutsisoqarfimmit suliarineqassasut akisussaaffigineqarpoq. Paasissutissanut elektronikkikkut atortunut tunngatillugu sillimaniarnikkut suliniutini minnerpaamik najoqqutassaniissapput

- 1) sillimaniarnikkut aaqqissuussaaneq, matumani paasissutissanik isumannaallisaanikkut suliaqarnermut atuuffiit akisussaaffeqarfillu,
- 2) oqartussaqaarfup paasissutissanut elektronikkikkut atortui, matumani ingerlatsinermit tunngasut teknologiillu,
- 3) qarasaasiatigut sillimaniarnermi ingerlatsinerit nalorninartunut qaffasissutsit akuersaarnartut attatiinnarnissaannut malittariaqakkat, aamma
- 4) qarasaasiatigut sillimaniarnermi pisut isumaginissaannut najoqqutassat.

Imm. 2. Sillimaniarnikkut piumasaqaatit atortutigut immikkut ittut suliarineqarneri sapinngisamik siusissukkut suliarineqarneri aallartinneqartassapput kingornami suliniutip ingerlannerani nutarterlugillu itisilerneqartassammata.

Imm. 3. Sillimaniarnikkut piumasaqaatit atortutigut immikkut ittuni sillimaniarnikkut najoqqutassat sillimaniarnikkullu piumasaqaatit suut naammassineqassasut pillugit tamakkiisuullutillu allaaserisaassapput. Piumasaqaatit pineqartut atortunik allagaatinut ilaatinneqarput.

V. Paasissutissanik immikkoortitanik allakkatigut elektronikkikkullu nassiussisarnerit il. il.

§ 29. Paasissutissanik ISERTUUSSASSATUT qaffasinnerusumilluunniit immikkoortitaasunik allakkatigut nassiussinermi paasissutissat atortunik qaleriinnik marlunnik akimut takuneqarsinnaanngitsunik poorlugit nassiussisoqartassaaq.

Imm. 2. Puua ilorleq puuani paasissutissatut assinganik immikkoortitsinermik oqaaseqaateqartinneqassaaq, puualu taanna asserneqarsimassaaq.

Imm. 3. Immikkoortitami oqaaseqaataasup puua qalleq qalleqqassanngilaq. Puua qalleq tiguisussap uppersarnerqarnera siunertaralugu nassiunnerani normulersimassaaq.

§ 30. Paasissutissanik ISERTUUSSASSAALLUINNARTUTUT imaluunniit ISERTUUSSASSATUT immikkoortitaasunik allakkatigut nassiussinermi taamaallaat inuit sillimaniarnikkut nassiussisussatut immikkoortitaanermik akuerisaasunit isumagineqartassapput.

Imm. 2. Paasissutissanik ISERTUUSSATUT immikkoortitanik nassiussinermi nassiussisussamit minnerpaamik nassiussisussatut immikkoortitatut akuerisaasumit pisariaqarpoq. Allatigut nassiussinermi taamaattoq pisinnaavoq nassiussinerni ataasiakkaani imminut illersorsinnaasutut nalilernerqartillugu.

Imm. 3. Paasissutissanik ISERTUUSSATUT immikkoortitanik Kunngearfiup Danmarkip iluani nassiussinermi tammatsaalisassatut nassiunneqarsinnaapput nassiussinerni tamani illersorsinnaasutut sukumiisumik naliliinikkut pisarsinnaavoq.

§ 31. Paasissutissanik SULINERMUT ATATILLUGU ATUGASSANIK qaffasinnerusumilluunniit attaveqaatikkut nassiussinermi Illersornissamut Oqartussat akuerisaannik paasiuminaallisaanermik periuseqarneq taamaallaat atorineqassaaq, tak. § 26.

§ 32. Paasissutissat immikkoortitanik imallit nassiunneqarniarpata inunnut nassiussap imarisaanut immikkoortitaasumut sillimaniarnikkut akuerisaasumut taamaallaat inuttalernerqarlutillu taakkunannga ammarneqartassapput.

§ 33. Paasissutissanik ISERTUUSSAALLUINNARTUTUT imaluunniit ISERTUUSSATUT immikkoortitaasunik allakkatigut nassiussinermi paasissutissap tiguernerani immikkut uppersaammik immersuiffissamik ilaneqartassaaq. Allatigut immikkoortitanut tunngatillugu suliaakkiisup piumasaqarneratigut uppersaasat immersugassaaq atorineqarsinnaavoq. Uppersaasat immersuiffissaaq puuanut iluanut ikisassaaq tiguisumit ernertumik atsiorneqassaaq nassiussisumullu utertinneqarluni. Uppersaasat immikkoortitaanngitsoq nalunaarsuinnermut assersuutitullu normunut paasissutissat pillugit taamaallaat imaqartinneqassaaq, assersuutigalugu taaguutitut tunngasunik imaqartinneqassanngilaq. Paasissutissanik nassiussisup uppersaasat tigunngippagu, imaluunniit kingusinaartumik tiguneqarpat, suna pissutaanersoq ernertumik misissuiffigalugu aallartinneqassaaq.

§ 34. Nassiussisut nassiussanillu isumaginittut atuakkami immikkut ittumi paasissutissanut immikkoortitanik imalimmi nassiussami tunniunnera uppersarsarniarlugu qulakkeertassavaat. Tamatumunnga atatillugu nassiussinermut normu poorisaata qaavani allaqqasuusoq atussavaat.

§ 35. Digitalimik attaveqaatitigut paasissutissanik immikkoortitanik nassiussinermi, imaluunniit atortutigut attaveqaatit taama ittuniittut, paasissutissanik immikkoortitanik allanik nassiussinermi immikkoortinneqassapput.

§ 36. Allaffinni ininilu paasissutissatut immikkoortitanut uninngasuutiginiisaanut paasissutissanillu elektronikkikkut atortunik uninngasuutiginiisaanut atortuni, matumani kabelit krydsfelterillu, susassaqqanngitsunut pissarsisinnaajunnaarsinniarlugit isumannaarneqassapput.

Imm. 2. Allaffinni ininilu paasissutissatut immikkoortitanik takunniffusinnaasuni sulisunit paasissutissanut tunngatillugu sillimaniarnikkut akuerisaasunit nakkutigineqassapput.

§ 37. Paasissutissat ISERTUUSSATUT qaffasinnerusumilluunniit immikkoortitaasut toqqorsivimmi parnaartartumi toqqorsimasuutigineqassapput inilu kalerrisaaruteqarluni. Sillimaniarnikkut atortut tamarmik Politiit isertortumik paasiniaasartuinit akuerineqarsimassapput.

Imm. 2. Toqqortaateqarnermut atortuni paasissutissat ISERTUUSSAALLUINNARTUT imaluunniit ISERTUUSSASSAT toqqortaatineqartillugit, taakku silataanni sillimaniarneq immikkut ittuussaaq kalerrisaaruteqarluni kalerrisaarutillu sanaartortuat akuerisaasimassalluni ajortoqartillugu ulloq unnuarlu kalerrisaarivimmut nalunaartartussamik.

Imm. 3. Parnaarsaatit kalerrisaarutillu akulikitsumik misissorneqartassapput.

§ 38. Aningaasaasivinnut imaluunniit assingisaannut parnaartartunut paasissutissat immikkoortitaasut toqqortaatineqartunut matuersaatit illu qimanneqartillugu matuersaasivik Politiit isertortumik paasiniaasartuinit akuerisaasumik ilisarnaatit atorlugit parnaartartumiitinneqassapput. Matuersaatit illumiit anninneqanngisaannassapput.

Imm. 2. Matuersaatit annaaneqarpata imaluunniit aningaasaasivimmut imaluunniit assingisaanut parnaartartumut kode paasineqartillugu, pisortamut attuumassuteqartumut imaluunniit sillimaniarnermi officerimut ernertumik nalunaarutigineqassaaq, tak. § 45, taassuma parnaartaatip kode-ata allanngortinnissaa taarserneqarnissaaluunniit iliuuseqarfissammagu.

§ 39. Paasissutissat immikkoortitaasut suliffigisamiit allamukaaneqartut tamat tikissinnaasaannukaanqassanngillat nakkutigineqaratillu qimaannarneqassanatik, matumani timmisartuni, umiatsiani, qamutini motoorilinni, akunnittarfinni imaluunniit atisaajartarfinni.

Imm. 2. Paasissutissat ISERTUUSSASSAALLUINNARTUTUT imaluunniit ISERTUUSSASSATUT immikkoortitaasut suliffimmiit assartorneqartillugit, assartorneqarnerisa nalaanni toqqorsimasuutigineqassapput toqqorsivimmi Politiit isertortumik paasiniaasartuinit akuerisaasumi.

Imm. 3. Paasissutissat ISERTUUSSATUT imaluunniit qaffasinnerusumik immikkoortitat suliffimmiit assartulersinnagit paasissutissat assersuutitut marlunnut nalunaarsuuteqartinneqassapput. Siulleq suliffimmiitinneqassaaq, aammaalu nassarneqassalluni katersugassaassappat nassarneqarluni. Allagaatit elektronikkikkoortut sillimaniarnikkut assilinera suliffimmi toqqortaatineqarlunilu nalunaarsussaaq, taamaaliorneqassaarlu katersugassaanninnami.

§ 40. Paasissutissat immikkoortitaasut annaaneqarsimappata, imaluunniit imarisai susassaqqanngitsumit ilisimaarineqalersimasut pasitsaassisoqassappat, pisortamut attuumassuteqartumut imaluunniit sillimaniarnermi officerimut nalunaarutigineqassaaq, tak. § 45, taassuma pisortamut ingerlateqqissavaa misissuisoqarnissaannillu iliuuseqarluni paasissutissanik suliakkiisoq nalunaarfigineqarniassammat, aammalu susassaqqanngitsup imarisaanik ilisimaarinnilersimaneratigut kingunerisassai

killilersimaarniarlugit imaluunniit paasissutissat imarisaanik ilisimannilersimappat kingunerisassai killilersimaarniarlugit pisarialimmik suliniuteqartoqarnissaanik aalajangiisoqassalluni, taamaattoq tak. imm. 2.

Imm. 2. Paasissutissat immikkoortitat Danmarkimit imaluunniit NATO-mit suliakkiutigineqartut annaaneqassappata, imaluunniit susassaqaangitsumit imarisaanik ilisimannilertoqarsimassasoq pasitsaassisoqassappat, suliakkiisoq aamma Politiit isertortumik paasiniaasartui ernertumik nalunaarfigineqassapput.

§ 41. Sorsuttuni imaluunniit ajorluinnartumik pisuni paasissutissat immikkoortitaasut susassaqaangitsunit tiguneqarnissaannut navianartorsiortinneqarlutik, paasissutissanut akisussaasoq ernertumik suliniuteqarnermigut isumannaatsumukaanniassavai, tamannali ajornarpat nungutinneqarnissai isumagissallugit.

Imm. 2. Digitalimik Sullissinermut Aqutsisoqarfik ajornartoortoqartillugu pilersaarusiussaaq isumannaatsumiilernissai imaluunniit nungutinneqarnissai imm. 1-imi taaneqartutut siunertaralugu.

§ 42. Pisariaqaangitsumik annertusiartuinnarnissai pinngitsoortinniarlugit paasissutissat immikkoortitaasut annertuallaalertumik pilerpata nungutinneqartariaqarput, inatsisip malitsigisaanik inatsit alla aalajangersagarluunniit alla aalajangersakkatut atuuttoq malinneqaangippat.

Imm. 2. Sillimaniarnermi officeri, tak. § 45, taannaassaaq nungutinnissaannut iliuuseqartoq.

Imm. 3. Nungutitsinermi malinnaaqqissaartoqassaaq ikuaallaanermi, qalipaait atornerini, makulering atorlugu aserorterineri allatigulluunniit aseruinnissaannik isumannaarinermi Politiillu isertortumik paasiniaasartuinit imaluunniit Illersornissamut Oqartussat akuerisaannik pissalluni.

Imm. 4. Paasissutissat ISERTUUSSASSAALLUINNARTUTUT imaluunniit ISERTUUSSASSATUT immikkoortitaasut nungutinneqarnerini atsiorfissaqarpoq inunnit marlunnit atsiugassamik, taakkuussappullu aserorterineri najuullutik isumannaarisuusut. Atsiukkami allaqqassaaq nalunaarsuineri normu, paasissutissanut tunngasoq, assersuusiap normui aamma aserorternerani periuserineqartoq.

§ 43. Aammattaaq paasissutissat immikkoortitaasut pisariaqaangitsumik amerlavallaannginnissaat siunertaralugu isiinnarmik takuneqarsinnaangitsumik assiliineq pisinnaavoq, allaqqaagarlu § 42-mi aalajangersagaq naapertorlugu nungutinneqassalluni. Isiinnarmik takuneqarsinnaangitsumik assiliineri immikkoortitatut pineqartumut sillimaniarnikkut akuerisaasumit taamaallaat isumagineqassaaq, aamma assilisat filmitai sillimaniarnek eqqarsaatigalugu allaqqaakkatulli illersorneqassallutik.

VII. Suliarinera nakkutilliinerlu

§ 44. Digitalimik Sullissinermut Aqutsisoqarfimmiit innersuussisoqarnerata kingorna kaajallaasitami matumani aalajangersakkat malinneqarnissaat siunertaralugu sillimaniarnikkut suliniutit pisariaqartut pillugit allaaserinertalimmik najoqqutassamik Naalakkersuisoqarfinni pisortaqaatigiit atulersitsissapput.

Imm. 2. Pisortani oqartussaqaarfiit ataasiakkaat nalorninarortoqartillugu naliliineq tunngavigalugu pisariaqarsorigunikku sillimaniarnikkut suliniuteqartoqassaaq taannalu Politiit isertortumik paasiniaasartui isumasiorlugit pisortani oqartussaqaarfik najoqqutassaliussaaq.

Imm. 3. Sillimaniarnermi suliniutitut najoqqutassat ilaat attuumassuteqartut pisortani oqartussaqaarfinni ataasiakkaani sulisunit pissarsiarineqarsinnaanngortinneqassapput.

§ 45. Digitalimik Sullissinermut Aqutsisoqarfik sillimaniarnermi officerimik toqqaassaaq aalajangersakkat suliarinerinik ikiuuttussamik aalajangersakkallu malinneqarnerisut pillugit malinnaasussamik. Pisortani oqartussaqaarfinni ataasiakkaani sulisut sillimaniarnermi officerimut attuumassuteqarfimminnut sillimaniarnermut tunngatillugu saaffiginnittarsinnaapput.

§ 46. Kaajallaasitami malittarisassat naammassineqarnissaat pillugit suleqatigiinnissamut Politiit isertortumik paasiniaasartui aamma Illersornissamut Oqartussat Digitalimik Sullissinermut Aqutsisoqarfik isumaqatigiissusiorfigissavaat, matumani qarasaasiaqarnikkut teknikkimut tunngasut aamma digitalimik toqqortaasiviit § 25 malillugu tunngasut ilanngullugit.

§ 47. Kaajallaasitami matumani aalajangersakkat suliarineqarnerini aamma pisortani oqartussaqaarfinni ataasiakkaani § 44, imm. 2 malillugu najoqqutassiornermi Politiit isertortumik paasiniaasartui siunnersuisassapput.

§ 48. Sillimaniarnikkut iliuuserineqartut malinneqarneri Kunngeqarfiup Danmarkip suliarineqarnissaanut pisussaaffigisai Politiit isertortumik paasiniaasartuinit aamma Illersornissamut Oqartussat nakkutilliisassapput, piffissamilu aalajangersimasumi alakkarterisassallutik, periarfissaappallu NATO-miit immikkut ilisimasallit peqatigalugit.

VIII. Atuutilerfia

§ 49. Kaajallaasitaq una atuutilerpoq ulloq 21. april 2022.

Naalakkersuisut Siulittaasuata Naalakkersuisoqarfia, ulloq 20. april 2022

Múte Bourup Egede
Naalakkersuisut Siulittaasuat

/ Hans-Peder Barlach Christensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut